

Bájkkeavijssa NuorttaSálto



Tæksta: Kitty Skapalen
Járggálibme: Divte Media AS/Ingrid Kintel

Aktisasjborggo julevsáme ávddánime gáktuj. Stivrrajádediddje Tone Finnesen, Árrana ádá direktorra Lars Magne Andreassen ja suohkanoajvve Anders Sæter sihti aktan barggat julevsáme kultuvra ávddánahttemdiehti. **Samarbeider om den lulesamiske utviklingen.** Styreleder Tone Finnesen, nytillsatt direktør ved Árran Lulesamisk Senter Lars Magne Andreassen og ordfører i Tysfjord kommune, Anders Sæter ønsker å samarbeide bredt for å videreutvikle den lulesamiske kulturen.

Árrana direktørramålssom

Árran julevsáme guovdátja almulasj direktørramålssom le juo tjadáduvvam, ja direktørra Lars Magne Andreassen galggá guovdátjav boahhte guhtta jage jádedit.

Dijstagá gáhtjoj Andreassen barggijt, stivrrajádediddjev Tone Finnesen ja Divtasvuona suohkanoajvve Anders Sæther aktisasj ávvudallamij, guovdátja ádá ávddánibme hárráj. Juska ij le állu ádá guovdátjin, de li Larsan ájádusá gáktu guovdásj galggá aktisattjat barggat iehtjádij.

-Sihtap lagáp aktisasjborgov Divtasvuona suohkanijn. Suohkanin ælla heva ressursa, danen sjaddá ájnas aktisasjborgujn, sierraláhkáj giellabargo gáktuj, javllá Lars Andreassen.

Aktisasj hásstalusá

Divtasvuona suohkan le oasse giella-háldadimguovlos, ja le Vuonabiele oajvveguovllo julevsámegiela hárráj, dan diehti le Andreassena mielas ájnas aktisasjborgujn Árrana ja suohkana gaskan.

- Árran sihtá aktan suohkanijn barggat, ja nav le aj nuppe bieles Suohkanstivrra snjuktjamáno 23. bieje mierredij

prosessav álget, gánná ulmme le lagáp aktisasjborggo ja ávkkít dajt máhttelisvuodajt ma gávnnuji giela, kultuvra ja sebrudakiellemá hárráj. Árranin le ávdebut læhkám guojmmesjiehtadus Ájluovta skávlájn, gánná oahppe oadtju barggoh árrjídallamav. Dálle vuojnnep dárbov álles suohkanav dán árnigij avtastahttet. Moarmesmánó 6. bieje tjáhkani sjehtadusá birra rádodittjat, subtsas Andreassen.

Sán le aj gáhttjum Hábmara-, Stájgo- ja Oarjjevuoldá suohkanij aktisasjborggij. - Divtasvuona suohkanin le sierra dille, gá suohkan le oasse giellaháldadimguovlos. Le sihke ájnas ja sávidahtte lagábut aktan barggat. Dan láhkáj ressursa buorebut háldaduvvi, ja álkkep sjaddá ulmijt jáksát jus aktidip. Árrana bieles ij le sáhka suohkanis bargojt rijbadit, valla ávkkít ressursajt ma gávnnuji. Aktan tjoavdeduvvi aktisasj hásstalusá buorep láhkáj.

- *Makkir tiemáj birra le sáhka?*

- Sjaddá luondulasj árvvaladdat sáme-giela álgodisævtojt suohkanin, mánájgárden, állessjattukáhpadasán sáme-gielan ja ietjá fágaj, guhkes áhpadimen ja oahpponævo. Duodden aj Árrana oassálasstem Ájluovta ja Måske ávddánahttembargon, kultuvrrabálggá ásadibme ja gáktu máhttep Ájluovta varresvuodaguovdátja ásadimev vájkkudit, nammat Andreassen.

Ressursajt suohkanin bisodit

Suohkanoajvve Anders Sætera mielas le ájnas sáme ressursajt suohkanin bisodit.

- *Mij ávkijt le Divtasvuona suohkanij aktisasjborgujn Árranijn?*

- Lagáp giellabargo ja aktisasjborggo oahpponævoj hárráj le ájnas. Prosjækta Ájluovta skávlájn ressursaskávlán hiejtuduvvá gæssáj, ja dájna prosjevtajn sihtap joarkket suohkanin, javllá Sæter. Andreassenij le sjehtadus aktisasjborgujn Divtasvuona suohkanijn oasse stuoráp strategias, gánná Árran dárba ienep aktisasjborgov guovdátjav nannitjit.

-Miján li ávkálasj aktisasjborgo moaddásij, valla dárbo le værmástagáv stuoreddit, javllá Andreassen.

Ádá duobddága

Andreassen gáhttju ulmutijt árvvalusájt buktet.

- Mij lip gullisa. Árrana sadje lahkabirusin le málsudahkes ja ávddánahtte. Ja buorre le gá Nuortta-Sálto suohkana li válldám stuoráp ávdás-vásstádusáv sámevuodas. Vierttip gávnna ietjama sajev dáj ádá duobddágijn. Jus náginijn li ájádusá majna Árran birri barggat duodden dasi man ávdás juo barggap, de le dássju buktet dajt ájádusájt.

Stivrrajádediddje Tone Finnesen jáhkka jur dat aktisasjborggo iehtjádij le ájnas guovdátja ávddánahttemij.

- *Makkir vuorddemusá li stivran ádá direktørraj?*

- Árran oadtju buorrelielak ja fágalasj smidá direktørav, guhtimusj aj ájádusájt ja ássijt tjadát. Árrana vuodogierge le giella, ja dav sihtap tjalmosit. Prosjevta ma li álgadum, galggi joarkket, javllá Tone Finnesen. - Barggap duola degu dutkaminstituhtajn, ja sjaddi tjáhkani Nordlánda universitehtajn boahhte vahko, giehttu Finnesen.

Lars Andreassen duoddi:

- Galggap vilá barggat ietjama guovdadájmaj, valla ihkap Árran mañenagi oadtju ietjá dahkamusájt boahhteájggáj.